

Niet alle verni'jing is een verbèttering.

Ken ie dät gevuul van onmacht a-j met de computer an de gank bint?

Now ikke wel. Disse wèke e-k zo stom ewest umme op een aanbod van Microsoft in te gaon um mien computer te upgraden naor Windows 10. Dät is mederner, 't ni'j ste en zol völle makkelijkerder wèen in bedienen. Aloewel ik der elemaole niet op zatte te wachen, wo-k wel èven kieken oe of wat ter meugelijk wazze. Now.. dät a-k bèter niet kunnen doen.

Want inies begun der 't ele circus van downloaden en weet ik völle wat al niet meer en van allerlei vraogeri'je wöör ik ook al niet de ballen van snappe, dus e-k de pc maer zien gank laoten gaon en naor mien atelier egaon met 't idee ... ik zal 't vanaovend wel weer bekieken.

Ach eremienjee ... wat een geklooi ... ik waere meer dan 2/3 van mien bestanden kwiet of konne die niet openen of bewärken. De aovend naor de knoppen ... en dät is op zich niet 't ärgste ... maer de ele nacht lègen te prakkeseren wat ter an de and kan wèen of oe ik wat kan doen umme 't weer te kunnen vinnen. Olde installatiecodes opzuken en opni'j invoeren en gao zo maer deur. In de vrogge mörgen van de dag derop weer bezig maer gien resultaat.

Now mu-k toch èven kalm an doen anders gaot der dingen gebeuren die niet onder de noemer nörmaal gedrag thuuseuren.

Wärkelijk ... Windows 10 zol makkelijkerder mutten wèen in bedienen en bewärkingen angaon, maer ik zol 't ele zakien aoste deur de roeten gooien. Ienmaol op 't atelier bin-k gewoon weer an-t wärk egaon. Op dit moment bin-k een old Härmonium, wöör ik alle muziek uut ebbe e-aald an-t ummebouwen een secretaere. De kaste uut ca 1910 is nog in Jugendstil emaaft en redelijk gaaf en is te mooi umme zo maer fot te gooien. Vandöör! Alles wak der an mutte doen ef mien andacht neudig dus kon-k mooi èven de computer vergèten. Een päär uur later e-k dan toch mien zonne maer ebeld en em met 't prebleem op-ezadeld. Extra ärde skijven eköch zodät de verbörge bestanden die vast nog wel ärgens staot opeslaegen, veilig te kunnen stellen veurdät värder ekèken kan wörren. De computer bij mien uus op-eaalt en dan kon ij der mooi op zien gemak naor kieken.

Ik ware nog niet terugge 't atelier of ij bellen al weer met de boskop . . . ik wete niet wöör ie last van ebben, maer alles stiet der gewoon op. Oeps . . .

Vandaag (vrij'dag) bint wi'j eertsens samen naor 't HCO ewest veur de boekpresentasie aover een Oorlog Verre Weg. Ik komme döör nog wel een keer op terugge. Döörnao bin-k maer met mien zonne met-egaon en ef hij mij eerst leren kieken naor wat ter now wel of niet op 't skerm stiet.

Man . . . wat wöör ik een olde zak . Ik wete wel da-j olde bomen niet mut verplanten, maer olde mensen mu-j ook gien ni'je besturingsprogramma's veur de computer ansmeren. Alle plagies en termnen bint anders of ie mutten 't via een tussenmenu weer veur de draod alen.

OK . . . alles stiet ter nog op en ik kan preberen ni'je stuikkies of verslaegen te skrieven.

Alle veranderring is gien verbèttering . . . of zol 't dan toch an mi'j lèggen ?
Ik wete wel wat elligen (h)endrik zaol ebben eroepen . . . BHAA !!

augustus 2015



Görendrögien W.